

Lieschtler Fasnacht 2007

D Bänk vom Muser Schang

Für Pitbulls gits e Muulchorbzwang - lut gsetzlichem Gebot
bym FCB hei Randalierer - Stadionverbot
Bym Mühlise do frogg my scho, - wie lang as ächt no got,
bis au für de e Muulchorb git - und Törlplatzverbot?!

I ha do für my Granium - mol Bluemeärde poschtet
bym Buechi het eso ne Sack - scho füzig Franke koschtet
Das syg der allerreinscht Komposcht – seit sFröilein und verzellt,
der Stadroot heb jetz au 10 Tonne – für dMuslimgräber bstellt.

D Frau Pegoraro chaufft denn doch no - Wiehnachtsgschänggli yy:
Rasch, packes mer die wissi Weste – für my Peter yy!
Wie isch die wärti Grössli denn - würd sFüzgi öppe go?
Nei, Zahle weiss I nit vom Maa - und ha nüt mitbyko!

E trurig, fulen Öpfel lyt - im brune Chäller unde
und fult dört uf der Öpfelhurt, - bald fulen au die gesunde!
Do seit de fülschti Öpfel fräch:- S wird Zyt, dass öppis goht!
I tarn my jetz as Chäller Ruedi - und wird Regierigsrot!

Me gsehts alls in der Rotsdebatte - us em Bundeshus
wie sDoris Leuthardt dAuge rollt – sie gheyen em fascht us!
Jetz heb em schynts am Telifon - der Heino offeriert,
er heb do non en alti Brülle, - wo das Problem cachiert!

Im türschte Loch vom Baselbiet - gits jetz au scho ne Geischt.
Dasch sChienbärgtunnel-Elsbeth – zNacht ghörsch wie's chlaggt und kreischt:
Huh huh, für alli Ewigkeit - muess I im Tunnel wohne,
as Stroof für die dreihundertfüzgi - verlockte Millione!

Me weiss scho lang, wenn dAerde bebt – no wärde dMönsche spitz
verreckter no as Nachbers Lumpi – kei Witz, Sie! Sache gits!
Drum lot mes zBasel rüttle – und schüttle ungeniert
und het nün Monet hindedry – Stürzahler generiert!

Wennd spinnsch, bringt s gäle Wägeli - Dy gschwind ins Hasebueh!!
Am meischte Spinner hebis schynts - by eus in Reigetschwil!
Do frogt my letschti ein, wo grad – die gäle Gondle zellt:
Eh, heit Dir jetz uf dWasserfalle - e Höheklirik gstellt?

Tschortsch Dabbelju, Tschortsch Dabbelju - Du bisch e dumme Sogge!
Schimpft der Alti mit em Jung: - Du hesch ein an der Glogge!
Syg nit so sträng, seit dMuetter Bush, - er isch nur chlei labil.
Oder meinsch I heb my tosche und - der Bueb isch doch debil?

Der Castro, wider ganz fidel – in syne grüne Lümpe
stoht vor em Buenavista-Club – und pafft Havanastümpe:
Caramba, jetz bald fertigschluss – Cuba libre! Kommunismus!
Wenn sogar ich weg Rauchverbot – vor dTüre use muss!

Am Farbfärnseh lauft Volksmusik – I mach grad Cordonbleu,
Do schmuust de Florian Silbereisen – mit der Mireille Mathieu!
Jetz wird de Bursch doch no ne Ma! – Der Haber het en gstoche!
Am beschte lehrsch halt immer no – uf alte Pfanne choche!

Im Schnee stoht grad vors Schuelhus gseicht:- Der Lehrer isch e Doofe!
Wer het das gmacht? Froggt sträng der Lehrer - dinne syni Goofe.
Do streckt der Peter uf und seit: - My Not het my so trybe!
Jo, I ha gschiff, das gib I zue,- doch sHeidi das het gschrybe!